



Broj: 158-1/2016
Datum: 4.03.2016.

**OTVORENO PISMO RATKU STJEPANOVIĆU, PREDSEDNIKU KLUBA
POSLANIKA SDS-A U SKUPŠTINI BRČKO DISTRIKTA**

Gospodine Stjepanoviću,

povodom Vaših izlaganja na sjednici Skupštine Brčko distrikta, koja je održana 3.03.2016. godine, a na kojoj se raspravljalo o statusu Evropskog univerziteta, želimo da Vam ukažemo na sljedeće:

1) Vaše izlaganje u vezi Evropskog univerziteta obiluje neistinama i vidljivo je da takve riječi može da izgovori samo neko ko je opterećen mržnjom prema Evropskom univerzitetu, što sebi ne bi smio da dozvoli neko ko se bavi javnim poslom kakav je obavljanje poslaničke funkcije. Naime, Vi ste izgovorili da su problemi, koji su nastali na relaciji Odjeljenje za obrazovanje – Evropski univerzitet, proistekli iz manjkavosti Zakona o visokom obrazovanju, i zbog toga što nije formirano pododjeljenje za visoko obrazovanje. Pa zar upravo Vaša tri propala šefa nisu vodila to Odjeljenje od 2012. godine? Zar oni ne snose odgovornost što nisu otklonjene manjkavosti u Zakonu? Da su oni bili sposobni, formirali bi pododjeljenje za visoko obrazovanje. Pitamo Vas kako je taj “manjkavi” Zakon mogao biti osnov da Vaši ljudi donesu nezakonito rješenje o oduzimanju naše licence, koje je Apelacioni sud poništio, a da im sada taj Zakon nije dobar da obavijeste Centar za informisanje i priznavanje visokoškolskih isprava, i druge subjekte da imamo licencu? Vaš posljednji, a sada već bivši šef Odjeljenja za obrazovanje je izmislio ovaj razlog kako bi “uvukao” Skupštinu u problem, čime je mislio da će zamagliti pred javnošću svoju odgovornost.

2) Rekli ste da ne možete glasati za zaključke kojima bi se uvelo normalno stanje u oblasti visokog obrazovanja, zato što ne možete stajati iza “nelegalnih diploma”, čime biste opravdali “nezakonit posao”. Na ovaj način dali ste sebi za pravo da preuzimate ingerencije suda i da proglasite diplome nelegalnim. Kada je u pitanju “nelegalni posao”, u pravu ste ako ste mislili da su Vaši šefovi Odjeljenja za obrazovanje vršili “nezakonite poslove”, jer Vaš bivši i posljednji šef Odjeljenja nije želio da sprovede pravosnažnu odluku suda, što direktno ugrožava vladavinu prava.

3) Pitali ste se da li bi oni koji će donositi odluke u narednom periodu željeli da njihovu djecu liječe ljekari sa diplomama sa ovih Univerziteta, zatim da im djecu uče oni koji su dobili diplome na ovim Univerzitetima, kao i da li bi željeli da im sude sudije sa diplomama ovih fakulteta. Na ovaj način uvrijedili ste sve profesore koji izvode nastavu na Evropskom univerzitetu i pripremaju studente za budući posao. Prije nego što ste ovo izgovorili, morali ste da utvrdite kakve kompetencije imaju profesori koji rade na Evropskom univerzitetu. A pošto to niste učinili, ukazujemo Vam da na Evropskom univerzitetu izvode nastavu profesori koji su svoja znanja i diplome sticali na univerzitetima u Sarajevu, Beogradu, Zagrebu, Tuzli, Novom Sadu, Osijeku, Skoplju, Podgorici, i drugim gradovima sa

prostora bivše Jugoslavije. Većina ovih profesora iza sebe ima rezultate i na naučnom i na praktičnom polju, o kojima Vi možete samo da sanjate. Biografije naših profesora istaknute su na sajtu Univerziteta, pa možete vidjeti kakve su njihove kompetencije.

Posebno ističemo da nastavu na Univerzitetu izvode i profesori koji su doktorate branili pred velikim imenima svjetske i domaće nauke, kao što su prof. dr. Vladimir Sergejevič Komisarov, šef katedre za krivično pravo i kriminologiju Univerziteta Lomonosov, koji je najpoznatiji stručnjak za ovu naučnu oblast u Rusiji, akademik prof. dr. Vladimir Kambovski, bivši ministar pravde Jugoslavije, bivši predsjednik Akademije nauka i umjetnosti Makedonije i bivši rektor državnog univerziteta u Skoplju, prof. dr. Sead Dedić, najbolji stručnjak za upravno, radno i socijalno pravo u Bosni i Hercegovini, prof. dr. Nedo Milićević, bivši predsjednik Ustavnog suda Federacije BiH i jedan od najpoznatijih stručnjaka za ustavno pravo Bosne i Hercegovine, prof. dr. Ljubiša Lazarević, najbolji stručnjak za krivično pravo u bivšoj Jugoslaviji, prof. dr. Radoslav Galić, član Američkog društva matematičara, prof. dr. Gligorije Perović, jedan od najboljih stručnjaka za geodeziju na prostoru bivše Jugoslavije i drugi.

Mnogi naši profesori su obavljali najodgovornije funkcije u državnim institucijama i privrednim subjektima. Mnogi su bili rektori, prorektori i dekani na državnim univerzitetima. Neki profesori izvode najsloženije hirurške zahvate i liječe najteže bolesnike u Kliničkom centru Srbije u Beogradu, na Vojno-medicinskoj akademiji u Beogradu, Univerzitetsko-kliničkom centru Tuzla, u zdravstvenim ustanovama u Osijeku i sl. U te profesore npr. spadaju čuveni hirurzi prof. dr. Branimir Marjanović, doc. dr. Adi Rifatbegović, doc. dr. Mufid Burgić, zatim čuveni stomatolozi prof. dr. Ranko Golijanin, doc. dr. Omer Pinjić, doc. dr. Miljan Bajić, stručnjak za porodičnu medicinu prof. dr. Rudika Gmajnić, poznati neurolog sa Kliničkog centra Srbije prof. dr. Nikola Ilanković i drugi. Građani Brčko distrikta često odlaze na liječenje upravo u navedene zdravstvene ustanove, gdje ih liječe, pored ostalih, i naši profesori. Da li su onda ti profesori dobri kad treba da liječe građane Distrikta, a ne valjaju kad treba da uče našu djecu? Isti ti profesori su i na drugim fakultetima obučili na desetine generacija studenata, koji su danas vrlo uspješni i priznati ljekari.

Umjesto što dovodite u sumnju stručnost naših profesora, bolje bi Vam bilo da se zapitate kakvi su Vaši rezultati rada iz oblasti ekonomije i da li Vi imate reference koje bi Vas preporučile nekom da mu budete ekonomski savjetnik. Kakav je Vaš doprinos razvoju ekonomije u Brčko distriktu? Navedite bar jedan Vaš uspjeh na poslovnom polju. Koliko znamo, radili ste kao interni revizor u Fondu zdravstvenog osiguranja Brčko distrikta, u vrijeme kada su tom Fondu propala finansijska sredstva u Bobar banci u pozamašnom iznosu od 14.747.741 KM. Čudi nas da Vi kao ekonomista, a usuđujete se da procjenjujete naše profesore iz oblasti zdravstva, prosvjete i prava, niste bili toliko stručni pa da znate da se prilikom plasiranja novca vodi računa o disperziji rizika, pa da zbog tog propusta ne propadnu tolika državna sredstva. Da li Vas zbog toga grize savjest? Pozivamo Vas da objasnite javnosti da li ste bili kompetentni da obavljate taj posao i da li ste ispunjavali sve potrebne uslove za obavljanje tog posla, kao i šta ste preduzimali da do toga ne dođe?

4) Vaš bivši šef Odjeljenja Stoparić predlagao je da Skupština da autentično tumačenje odredbe člana 29 stav 6 Zakona o visokom obrazovanju. Međutim, u ovoj odredbi sadržana je tehnička greška. Vama i Vašim šefovima treba da bude jasno da se tehničke greške, koje postoje u odredbama zakona, mogu otklanjati isključivo izmjenama zakona. Autentičnim tumačenjem se određuje pravi smisao odredbe koju je zakonodavac htio da joj da u vrijeme donošenja. Ovo znači da se autentičnim tumačenjem ne mogu otklanjati tehničke greške.

5) Vašim izlaganjem ste nam pomogli da otklonimo zabludu, jer smo smatrali da iza ove nezakonitosti, koju Odjeljenje preduzima prema nama, stoji gospodin Mladen Bosić, a sada se jasno vidi da ste Vi, sa pojedinim Vašim istomišljenicima, bili kreator te nezakonitosti. Vi ćete, gospodine Stjepanoviću, ostati upamćeni jedino po tome što ste, krijući se iza imuniteta koji Vam obezbjeđuje poslanički mandat, zloupotrebljavali skupštinsku govornicu i blatili Evropski univerzitet u namjeri da konvalidirate nezakonite radnje Vaša tri


propala šefa Odjeljenja za obrazovanje. Zbog takvog Vašeg ponašanja Evropski univerzitet i njegovi profesori protiv Vas će podnijeti tužbe za naknadu štete. Što se tiče Evropskog univerziteta, on će i dalje bilježiti pozitivne rezultate u svom radu i nastojće da poboljša svoju poziciju na rang listi visokoškolskih ustanova u Bosni i Hercegovini, na kojoj sada zauzima šesto mjesto. Postoje neutralni i kompetentni analitičari koji znaju da vrednuju rad Evropskog univerziteta, za razliku od Vas i Vaših istomišljenika. Evropski univerzitet će raditi i onda kada Vi i Vaši istomišljenici na političkoj sceni postanete prošlost.

ZA EVROPSKI UNIVERZITET


Prof. dr Mirko Kulić, rektor Univerziteta



Prof. dr. Nedeljko Stanković, dekan Pravnog fakulteta




Prof. dr. Rudika Grmajnić, dekan Fakulteta zdravstvenih nauka




Prof. dr. Halid Žigić, dekan Tehničkog fakulteta



Prof. dr. Zoran Milošević, dekan Fakulteta političkih nauka



Prof. dr. Drago Tešanović, dekan Pedagoškog fakulteta



Doc. dr. Anka Bulatović, dekan Ekonomskog fakulteta



Mr. Albina Abidović, generalni sekretar Univerziteta

